

Govor predsjedatelja Zastupničkog doma Parlamentarne skupštine Bosne i Hercegovine dr. Denisa Bećirovića na 5. Konferenciji predsjednika parlamenata zemalja Zapadnog Balkana u okviru sesije "Suradnja u dimenzijama sigurnosti na zapadnom Balkanu"
Budimpešta, 12. listopada 2011.

Poštovani gospospodine predsjedavajući,
Poštovane kolege,
Dame i gospodo,

Dopustite mi da vas, u ime Predstavničkog doma Parlamentarne skupštine Bosne i Hercegovine, pozdravim i uputim iskrene riječi zahvalnosti domaćinu današnjeg skupa Narodnoj skupštini Mađarske i izrazim podršku dosadašnjoj ulozi Mađarske u promociji integriranja zemalja zapadnog Balkana u ujedinjenu Evropu.

Također, ovo je prilika da čestitam Hrvatskoj završetak pregovora i dobivanje datuma stupanja u punopravno članstvo EU. Stupanjem Hrvatske u članstvo EU, Evropska unija stiže na granice BiH. To je novi izazov i podsticaj svima nama da povećamo napore na našem evropskom putu.

Dame i gospodo,

Živimo u vremenu u kojem se novim sigurnosnim prijetnjama možemo suprotstaviti samo zajedničkom kolektivnom akcijom, jer one ne mogu biti prevaziđene naporima pojedinačnih zemalja.

Jedini instrument za rješavanje gorućih sigurnosnih regionalnih pitanja na Balkanu jesu dogovor i iskrena saradnja.

Zato je neophodno otkloniti nepovjerenje među zemljama i narodima regiona kada je sigurnost u pitanju, poboljšati razmjenu informacija, ne bježati od zajedničkih inicijativa.

Dame i gospodo,

Podrška Evropske unije pomogla je BiH i zemljama u regiji da unaprijede svoje zajedničke kapacitete za borbu protiv kriminala, te zahvaljujući tome zemlje zapadnog Balkana sada polako ali sigurno izlaze iz situacije u kojoj su kriminalci mogli tražiti utočište u susjednim zemljama.

Naveo bih još neke od pozitivnih primjera. Reforma odbrane u BiH smatra se jednom od najuspješnijih, a pristupanjem NATO programu Partnerstvo za mir a potom i MAP-u, BiH je postigla veliki napredak.

Treba naglasiti da je ulazak Bosne i Hercegovine u NATO Pakt jedan od dva glavna vanjskopolitička cilja naše države. U vezi s ovim pitanjem postoji bazični politički konsenzus svih relevantnih političkih stranka u Bosni i Hercegovini. Ubrzanje prijema Bosne i Hercegovine u NATO znači i istovremeno stvaranje ambijenta stabilnosti i sigurnosti u jugoistočnoj Evropi.

Također, želim istaknuti da je ispunjavanje obaveza Bosne i Hercegovine iz Mape puta za liberalizaciju viznog režima rezultiralo ispunjavanjem obaveza iz Sporazuma o stabilizaciji i pridruživanju daleko prije rokova predviđenih samim sporazumom.

Dame i gospodo,

Sve zemlje zapadnog Balkana su na putu evropske integracije, iako u različitom statusu i fazama institucionalnih odnosa sa EU.

To je rezultiralo i jačanjem svijesti o značaju i ulozi našeg međusobnog povezivanja u svim oblastima, od slobodne trgovine, investicija, energetike, infrastrukture, do zajedničkih akcija u borbi protiv korupcije i svih vidova organiziranog kriminala.

Uostalom, regionalna saradnja je osnivački princip i filozofija EU.

Ali, osnovni preduslov za razvoj svih oblasti jeste sigurno okruženje. Sigurnosni uslovi stalno se potvrđuju kao važan faktor ekonomske tranzicije i razvoja.

Dame i gospodo,

Euroatlantska struktura učvrstila je mir i sigurnost u podijeljenoj Evropi prije više od šest decenija.

Ako se ovaj koncept pokazao kao uspješan i prihvatljiv za sve narode i njihove države u Evropi, sasvim je izvjesno da je to model i za države zapadnog Balkana.

Naša zajednička opredjeljenja treba da budu demokratski odgovor i odlučna politička akcija protiv zajedničkih prijetnji i opasnosti kojima su izložene demokratske zemlje danas u svijetu.

Tranzicija našeg regiona od sigurnosnog problema do sigurnosnog partnera obavezuje nas na to da ovaj region učinimo stabilnim i sigurnim.

Nadam se da novi duh saradnje neće ostati samo na riječima već da će imati i svoju praktičnu primjenu.

Hvala na pažnji!